


Aruba Dushi Tera


Oro na Aruba

Na maart di 1824 - 176 aña pasá - Willem Rasmijn, un chabalito di 12 aña, tabata cuida e carnenan di su tata, Jaco. E pobercito tabata pia abao y cada rato e tin cu sac pa kita sumpiña fey bao su pia. Su tata a bisé si e kier zapato, e mester traha p'e cumpra un par.

Willem a pasa den Rooi Fluit cu su carnenan. Banda di un lugar jamaá Lagabai, atrobe un sumpiña a hinké bon duro. El a sac pa ranké y..... Na e momento ey el a mira un cos ta lombra mei-mei di tur e piedranan sushi di tera. El a coi e 'piedra' lombrante, hinké den su saco di carson p'e mustra su tata. Ora el a jega cas ta prome cos cu el a haci. "Mira, papa, m'a haya un bunita piedra den rooi. E ta lombra bunita, no?" Willem a tene e piedra straño den su plant'i man y ta bai-bin cuné p'e lombra mas den solo. Jaco si a mira cu no tabata un piedra conque, sino aki ta trata di oro puro. Pero Jaco no tabata tin idea di cuanto balor e pida oro aki tin. Su mañan el a baha Playa p'e bai cerca un comerciante cu lo por yudé. E comerciante sabí a mira mesora cu ta un bon klompi' oro y ya cu Jaco no sa su balor, el a ofrecé 17 'patin' (un moneda bieo di Aruba) cu ta mas o menos 34 florin. Shon comerciante si a drei bendé pa 70 'patin' o sea 140 florin, loke e tempo ey tabata masha placa.



E ruina di e planta na Bushiribana di aña 1872



E ruina di e planta na Balashi

Jaco tabata bai busca oro tur dia den rooi y tur loke e haya e tabata bende cu e comerciante. E negoshi aki a sigui bon pa tur dos te dia cu Jaco, den su burachería, a reda e secreto di oro den Rooi Fluit. E buscamiento di oro a bira publico.

Homber y muher, grandi y chikito tabata bin rondia. Noticia a core cu den Rooi di Daimari un mucha muher indjan a haya un klompi basta grandi di oro. Cantidad di buscador a plama bai Daimari. Otro lugarnan tabata Matividiri, Tibushi, Cero Plat, Cero Cristal, Cero Gerard, Arikok, Sta. Lucia, Hadicurari, Wacobana y Mira Lamar.

Tabata tin dos sorto di oro: Ora aluvial - cu tabata wordo hayá den rooi y ta djies laba e klei kité; Oro mineral - tabata manera 'un ader' di oro den piedra. Pa haya esaki mester garna e piedra. Durante añanan 1824, segun historia, nan a haya casi 50.000 kilo di oro. Na 1825 alrededor di 21.231 kilo durante e prome 8 lunanan.

A bin plantanan pa dirti oro na Bushiribana na 1872 y na 1899 un otro planta na Balashi.

Aruba tabata exportá oro. Prome guerra mundial a trece un cambio negativo. E industria a haya dificultad y procesamento di oro a para. Na 1916 no a exporta oro mas. E dos plantanan a keda pará y ningun hende a mantené e mashinnan cu despues a bai perdí. Na 1946 nan a purba di bolbe lanta e industria aki, pero nan no a logra.

Awe nos por mira ainda loke a resta di un tempo di gloria, Aruba su era di oro - e ruinan di Bushiribana y Balashi.....!

ICH



CHABALITO

Number 7 - Año 2 - Maart, 2000 - Afl. 2,=

